

江

西

詩

徵

江西詩徵卷九十二

南城曾煥賓谷編輯

雜流

潯陽漁父

漁父無姓名太康孫緬爲潯陽太守遇之水濱神  
韻蕭灑垂綸長嘯緬問有魚賣乎笑曰其釣非釣  
寧賣魚乎緬遂褰裳涉水謂曰竊觀先生有道者  
也何晦用若是漁父曰僕山海狂人不達世務未  
辨賤貧無論富貴乃長歌鼓棹而去

歌

竹竿籊籊湖水泚泚相忘爲樂貪餌吞鉤非夷非惠聊以

忘憂

洪州衙軍將

汨羅江上有屈子祠以漁父配享唐末有洪州衙  
軍將題詩一絕於壁

屈子祠

蒼藤古木幾經春舊祀祠堂小水濱行客漫陳三酹酒大  
夫元是獨醒人

廬陵登雲莊田父

歐陽守道適野憩一田舍見壁間有詩問之童子  
對曰吾翁耕登雲莊田此詩吾翁作也守道爲作  
登雲莊記

題壁

雲兮雲兮變化有神靈兮捲起地下黃飛去天上青兮仙人乘雲天尺五借我清陰覆赤土雲間逍遙人間苦年年苦時望君雨

王老

宋咸淳間龍泉縣有賣豆腐王老者年八十有六平生樸素不識字忽呼其子告以欲歸令代書豆腐詩云云言訖坐化

詩

朝朝只與磨爲親推轉無邊大法輪展出一團真白玉將歸付與未來人

鄧聖章

聖章寧州人素有道術祈晴禱雨治病驅邪輒有應

臨終偈

落落魄魄無執無著不喜不怒先覺後覺跳出塵籠蓬萊著脚

鍾傳客

傳鎮江西日客有以覆射之說求見者傳以歷日包桶置袖中令射客答云云

覆射辭

太歲當頭立諸神不敢當其中有一物猶帶洞庭香

星士

廣信謝琛將誕降其父與一星士相善先一日辭別遠遊琛父遣人追及以所生時日令推之星士卽批錄云云初不甚解及琛成進士官御史有直聲轉兵備副使回朝復命月夜佩劍徘徊鄧公橋上驀然見狐妖軼出後宮因拔劍斬之始悟星士之語

語

好申日好申時異時必定拜丹墀丈夫手執莫邪劍鄧公橋上斬狐狸

夏洞源

分宜夏洞源以善卜名萬歷間能奇中司寇張公  
寅賓方應試洞源贈一錦囊屬試後開視後果驗

卜詞

寅賓至秋鹿鳴呦呦滕王風送名滿九州

鵝池翁

鵝池翁天啟間卜者不言姓名居彭澤西門賣卜  
近二載得錢卽沽酒獨飲飲必盡醉醉卽伸紙疾  
書書罷輒棄其稿不以示人有造訪者亦不荅拜  
最後人於廢紙中得其詩二首遂逸去

詩

落日殘橋外維舟興不孤春潮滿前岸江鳥下平蕪負笈

纔離楚吹簫又入吳千金輕一擲漫自說呼盧

浪跡江湖信此身綈袍誰念故人貧沙汀逐鶴渾閑事風雨看花送好春抱玉幾年曾獻楚懷書垂老不干秦明朝說有孤山約短艇長歌拂釣綸

李興

興樂安人年十六患瘋癇籬條其口箝如眼喎如手攣如欲食則仆臥於地始能下咽欲言則畫地作字始達其意然頗能詩董侍御時望未第時在里社中興行丐至僉令獻董詩須臾而就董禮而食之欲使養於官辭以老母在董爲作傳

獻董秀才



西言集 卷九 一 二  
鵬鶚直翀霄漢迴龍泉高射斗牛光清時早展爲霖手莫  
遣蒼生望八荒

邵珉

珉貴溪人嘉靖間以富戶編充庫役一日內庫失  
銀遂以盜擬繫獄追償珉從獄中詩官見詩乃  
釋之

獄中詩

月落烏啼霜滿衣木魚敲徹五更雞吾民不解青蚨法安  
得金錢一夜飛

李家明

家明泰和人南唐元宗時爲樂部頭談諧敏給善

爲諷辭

元宗釣魚無獲進詩

玉盤垂鉤興正濃  
碧池春暖水溶溶  
凡鱗不敢吞香餌  
知是君王合釣龍

詠臥牛

元宗游後苑登臺見牛晚臥美蔭家明日臣不學敢上絕句相背慙

曾遭寧戚鞭敲角  
又被田單火燎身  
閒向斜陽嚼枯草  
近來問喘更無人

題紙薦止宋齊邱哭子

烈祖受楊氏禪遷讓皇於海陵元宗繼統用齊邱之謀無

少長殺之齊邱無子晚得一子隨卒慟不止家明日惟臣能止之乃爲詩書紙薦上乘風吹之度至齊邱家遂絕其纜齊邱見之慙感乃止

化家爲國實良圖  
總是先生作計謨  
一個孩兒揀不得讓

皇百口合何如

詠皖公山

龍舟輕颺錦帆風  
正值宸游望遠空  
迴首皖公山色翠  
影斜不到壽杯中

輦輦

輦字中道南昌人宏治中爲內官監左丞雅事文  
墨兼尙理學有冲虛集

贈顧滌

與君少小定交游  
今日相逢兩鬢秋  
天上風雲眞似夢  
人間歲月竟如流  
可憐王粲依劉表  
不遇常何薦馬周  
安得忘機共漁父  
白蘋洲上數沙鷗

見狻猊偶作

聖德彰戎服狻猊遠貢將雖然爲異物費我大官羊

名妓

蓮花妓

蓮花豫章人陳陶隱南昌西山鎮帥嚴宇遣之侍

陶陶不顧因獻詩求去

獻陳陶處士

蓮花爲號玉爲腮珍重尙書遣妾來處士不生巫峽夢虛  
勞神女下陽臺

楚娘

楚娘建昌妓後歸三山林茂叔

桂花

丹桂迎風舊蕾開  
摘來斜插竟相偎  
清香不與羣芳並  
仙種原從月裏來

臨川妓

張安國守臨川王宣子解廬陵郡印歸次撫安國  
置酒招郡士陳漢卿參會適散樂一妓言學作詩  
漢卿語之太守呼爲五馬今日兩州使君對席便  
成十馬汝體此意作八句妓乃高吟云云安國歎  
賞竟日賞以萬錢

郡守席上作

同是天邊侍從臣  
江頭相遇轉情親  
瑩如臨汝無瑕玉  
暖

作廬陵有脚春五馬今朝成十馬兩人前日壓千人便看  
飛詔催歸去共坐中書秉化鈞

景翩翩

翩翩字三昧一字驚鴻建昌青樓女與梅生子庾  
以風流意氣相許有婚姻之約不果久之窮困以  
死有散花吟王伯穀有詩云閩中女子最能詩寄  
我一部散花詞雖然未見天女面快語堪當食荔  
枝翩翩本家盱江時出遊建安故伯穀誤以爲閩  
中女子又明詩綜云翩翩嫁丁長發丁爲人誣訟  
於官翩翩竟自經

送幼于還吳門

花前雙淚濕衣裾把酒江亭落照餘此去吳門霜月滿逢  
人好寄洞庭書

寄陳八玉英時留姑蘇

何處簫聲獨上樓傷心桃葉水空流一從南國春歸後無  
復佳人字莫愁

閨情

飛飛雙蛺蝶底事過隣家家海棠樹春來已見花  
憶自折楊柳長亭贈玉驄如今楊花白日日解隨風  
夜靜還未眠蛩吟遽難歇無那一片心說向雲間月  
窓前六出花心與寒風折不是郎歸遲郎處無冰雪

五日汎舟得男字

浴罷試冰蠶重扶碧玉簪操舟臨淮水作賦吊湘潭曲誤  
郎應顧盧回客自酣此時論黛色誰復鬪宜男

晏起

晏起茶香解宿醺闌干花氣午氤氲侍兒指點湘簾外若  
箇春山多白雲

與蘇生話別

十日平原酒三秋江上船一經搖落後明月幾回圓  
月出人未來月缺人已去好共借餘輝相求直至曙  
道是愁無極還教仗醉魔誰知醒時意說向醉中多

紫蘭

碧玉參差簇紫英當年剩有國香名風前漫結幽人佩豐



浦春深寄未成

七夕

樓前簫史憶吹簫  
雁足西風倍寂寥  
望斷支機應化石  
愁填烏鵲未成橋  
素毫月冷吟梧葉  
紈扇秋回識柳條  
姊妹東隣如乞巧  
莫教瓜果浪相招

夜坐

柳底繁陰月易藏  
無端寒露泣寒螿  
殘秋莫坐空堂夜  
二十五聲點點長

舟發沙溪

青溪九曲白雲鄉  
溪上行舟欵乃長  
誰把金丸打野鴨  
偏驚幾處睡鴛鴦

寫蘭

道是深林種還憐出谷香不因風力緊何以度瀟湘  
但吹花信風莫作妒花雨我欲采瑤枝挽得同心住

風雨

風雨滯殘春豈但梨花悶夢裏萬重山疊起江南恨

飛蓬

飛蓬羞倚合歡牀明月如水夜欲霜夢裏新翻雲髻樣暗  
塵鋪滿鳳凰箱

襄陽蹋銅蹄

郎自襄陽人慣飲襄陽酒未醉向郎言郎醒應回首  
漢水自盈盈男兒自遠征不知別後夢底夜到宜城

駿馬蹋銅蹄金羈艷隴西郎應重意氣妾豈向人啼

四月一日雨

九十春光已暗過雕闌花信竟如何應知雨意和愁約雨  
到牀頭愁亦多

送張孝廉

柳絲細織曉烟青惻惻春寒長短亭馬度山腰蹄尙嬾濕  
雲如夢未全醒

休洗紅

休洗紅洗多紅色減色減無時歸質弱難重染祇將紅淚  
共流東褪却無由綴落紅

休洗紅洗多漸成故能無故色殊替將新色妬新新故故

蓮相因莫教淺淡北他人

采蓮曲

十里湖如鏡紅蓮个个香  
大姑先戲水蕩散兩鴛鴦  
小姑采蓮花莫漫采蓮藕  
采藕柳絲長問姑姑知否

三月卽事

三月春無味楊花惹曉風  
莫行流水岸片片是殘紅

女兒子

哀猿一聲夜未半峽峽柔腸寸寸斷  
回川逆折聲潺潺枕邊流淚摧朱顏

安東平

西風吹衣北風吹面郎旣相迎郎心未變

詞譜卷九十二  
驅車終日留儂喘息徐語向郎郎意毋亟  
遺郎尺錦是儂寸心十日一線五日一鍼  
郎心不窮報以溫語旣郎此情勝多多許  
明神在右明月在天神願鑒止與月長圓

泰寧病中

春日顰眉長閉門東風吹雨倍銷魂不知野外垂絲柳青  
入南頭第幾村

寄陳生廻文

簫吹靜閣曉含情片片飛花映日晴寥寂淚痕雙對枕短  
長歌曲幾調箏橋垂綠柳侵眉淡榻繞紅雲拂袖輕遙望  
四山青極目銷魂黯處亂啼鶯

畫眉

驚去春如夢梅黃雨尙癡可堪明鏡裏獨自畫蛾眉

怨辭

豈曰道路長君懷自阻止妾心亦車輪日日萬餘里  
妾作溪中水水流不離石君心楊柳花隨風無定跡

野外

曉雨泉爭響春山鶯亂啼流雲兩三片移過石橋西

青溪曲

昨自建州來僑住青溪北紛紛白晢郎羣趨願相識  
日乘芙蓉車七貴相爾汝妾本吳中人好就吳儂語  
石橋橫溪水華月流青天橋上步羅襪可是凌波仙

與歡深夜歸小妹調箏歇並坐結同心引到樓頭月

小垂手

金罍溢倡酬媚眼轉驚秋折腰隨鷺下垂手與龍游夸容  
未再理明月在西樓

桃葉歌

儂白喚桃葉儂貌似桃花桃花容易落郎去宿誰家

寄遠

驅車一以疾相見何遲遲思君平昔意不似薄情兒  
江上望歸櫂君歸未有期試看圓缺月是儂腸斷時

寄情十四韻

握粟詹子美端著竟我欺前魚如未去下鳳故應遲荏苒

驚吹律、淒涼憶履綦。漫餐妃子秀，虛齧舍人飴。嬾去初侵  
鬢，顰回恰到眉。淚痕留琥珀，花勝淡燕支。露遣冰紈冷，風  
傳畫角悲。題盤緣伯玉，擣素事班姬。苦海填愁遍，盟山着  
恨移。秋深仍繫帛，日入已棲埭。石闕何能解，刀頭尚可期。  
三緣經曲折，五內幾妍媸。塵掩菱花鏡，心搖桂葉旗。何妨  
梁下信，更作有情癡。

解嘲

閨中自昔論紅線，俠氣縱橫頻掣電。來作處女君未知，去  
矣脫兔容誰見。世上徒誇屋是金，明珠換骨不換心。一自  
臨邛罷綠綺，只今千載無知音。

青樓怨寄郭生



欲歌春望詞誰是知音者  
門口木蘭舟常繫垂楊下  
兀坐掩房櫳捧心詎嬌態  
聞說金張兒懶出堂前拜

無名氏

天橋遊人

鄧紫陽墓在麻姑山尸解後自京歸葬詞客留題  
者極多後一少年偶題一絕尾書天橋遊人自是  
無復留詩者

詩

鶴老芝田雞在籠上清那與俗塵同  
旣言白日昇天去何事人間有殯宮

李善寧子

臨川李善寬子十歲能卽賦詩親友嘗以爲家  
壁試之畧不措思而就

家壁

椒氣從何得燈光繫處分拖涎來藻飾唯有篆愁君

南豐無名子

曾博士易占以仕不遇卒夫人朱氏無以自存頗  
諸孤歸里中文定兄弟六人俱寥落與長弟牟應  
舉復不第里人以詩嘲之文定初不介意力教諸  
弟不懈嘉祐二年俱中鄉薦復試禮部皆捷數年  
並躋華要曾氏由是興

嘲詩

三年一度舉場開落殺曾家兩秀才  
有似簾間雙燕子一雙飛去一雙來

題麻姑壇詩

皇祐中江西有一事與蔡經事正類  
或題麻姑壇記以嘲之

詩

五百年來別恨多東征重得見青蛾  
孽麟方擬窮歡喜不奈閑人背癢何

臨江驛舍詩

紹聖中毀東坡上清宮碑令蔡京別撰  
有人過臨江軍驛舍題二詩不書姓名

詩

李白當年謫夜郎中原不復漢文章納官贖罪何人在壯  
士悲歌泣兩行

晉公功業冠皇唐吏部文章日月光千載斷碑人膽炙不  
知世有段文昌

逍遙觀詩

安仁招仙山舊名黃婆店世傳東晉有黃婆市酒  
王郭二仙經過黃婆舍基爲觀名招仙觀宣和中  
賜額曰逍遙有無名氏詩

詩

昔設黃婆舊酒壚如何今日似蓬壺只因王郭仙人過化

作青城上帝都

陶公醉石詩

江州有陶公醉石宋時里人題詩云云

詩

五字高吟酒一瓢廬山千古想風標至今門外青青柳不  
爲東風肯折腰

高安太守

高安幸元龍字震甫號松垣嘉泰間進士有氣節  
以詩援任濤例求免稅丁太守判云云震甫通判  
鄂州上書雪濟郎冤屏廢而卒

判幸元龍求免役詩後

松垣筆力破滄溟欲掇任瀟免稅丁一段風流好公案錦  
江重寫入圖經

番陽布衣

宋時有番陽布衣書中山驛壁云回首萬里歲晚  
何言云云并題詩一首

書中山驛壁

回頭四十五年非無賴秋光滿客衣可惜吳中蓴菜好陸  
機張翰不同歸

玉壺洞客

彭澤縣石壁山一名玉壺洞宋時有客題一詩適  
縣尉祈雨經其地見墨跡未乾追之不得

詩

洞前流水碧于苔  
洞口桃花撲面開  
轉頭望斷意不斷  
長嘯一聲須再來

江右旅邸題壁

詩

有約未歸蠶結局  
小軒空度牡丹春  
夜來揀盡鴛鴦繭  
留織春衫寄遠人

無名氏義試詩

南宋時南豐鄉里諸齋出題示學者賦詩考殿最

名義試詩

孔明草廬圖

南陽高臥屈將軍往事流傳水墨昏莫訝軸閒茅屋小箇  
中藏得漢乾坤

葡萄月

春藤上架翠成窩顆顆圓光得月多疑是藥珠閒夕宴結  
成珠帳待常娥

鄧生

至元乙卯北兵至誣肝城從賊大恣焚掠婦女從  
而北者八萬人其時江西行省中丞則魏號也密  
啟於王元帥曰南城舊豔名天下王其留意故肝  
城罹難以是役爲最後有鄧生者作詩哀之

哀里中難婦詩



綠鬢蓬飛面懶勻可憐  
三日色逡巡琴心似在南  
君子馬首今成北婦人零  
落鈿蟬青塚月嬌添鶯柳  
上林春丈夫不殺王恩大  
努力前行赴此身

琵琶哀怨不勝情生小山  
頭怯禁城畔國臣非關婦  
罪庶人妾不樂王京巢烏  
雨點歸林密櫪馬宵嘶去  
夢醒正是平時高雨足誰  
人麥飯餉東耕

長條薜荔覆積垣婦去田  
荒室不存尙有倉箱能再  
壻難將梁笏待新昏過河  
書斷知魚泣入帳春生厭  
毳溫剪髮猓雛防解語同  
行相戒盡聲吞

身隨多寶押歸船霧鬢風  
鬟幾度遷舊沛新豐鄉國  
異南箕北斗帝天偏紅渠  
珠幌然初旭素手銀瓶夢  
故泉嬰乳

不知啼去婦含飴日狎老姑前

元無名氏鄱江詩

詩

注目望僊舟寒江隔岸流青山新沐雨碧柳倒懸秋霞彩  
明孤鷺波光淨一鷗笑談清意足此處復何愁  
蘆花拂釣舟雙港水交流霧暗龍湫晚風清雁澤秋時光  
驚過客世事悟浮鷗輸與垂綸者烟波不解愁

安仁清樂寺詩

蘇東坡過清樂寺暫翠雲閣三字揭之山門里人  
題詩云云

詩

坡仙三大字光采照禪關老衲留茶話春深綠滿山

吉安三詩

吉安舊有十閣老九尙書十狀元之詩詩卽不甚  
雅亦足鳴一時之盛九尙書之中原遺泰和吏部  
尙書劉公崧此後泰和又增吏部尙書羅公欽順  
禮部尙書歐陽公德右都御史贈工部尙書陳公  
鳳梧安福吏部尙書王公學夔工部尙書聶公豹  
吉水增兵部尙書毛公伯溫萬安增工部尙書朱  
公衡永新增禮部尙書尹公臺總二十尙書云十  
狀元之後增羅文恭洪先總十一人

十閣老詩

皇明內閣秉衡鈞吉郡堂堂已十人東里後來名尹直南  
臯先進是陳循定之安簡胡光大純道彭華解大紳千載  
貞元嘉會合天教諸老佐昌辰

九尚書詩

開國分曹設六卿吏工戶禮及兵刑周忱王直連王梁蕭  
昶蕭禎并廣衡更有二劉宜聯八座歷遷三部是維禎滿  
朝金紫皆時傑盡是廬陵九邑生

十狀元詩

天開文運盛廬陵累占鰲頭已十人胡廣侍中兼子啟彭  
時劉儼與羅倫後來彭教同曾彥前有陳循并鶴齡何事  
三元爭些子斯文翹望在明春

松山老叟

歸宗寺西數里卽柴桑地北爲楊柳橋崇正間春  
漲橋斷司李廖文英解腰圍銀帶以續逾月橋成  
有老叟唱歌云云高步而去遂改橋爲清風橋

歌

處士何曾是姓陶菊花人醉風蕭蕭使君腰上銀都了袖  
挾清風過此橋

程某

崇正時南坡教坊擅色藝者有楚玉錦含菱生絲  
老諸人皆嘗供奉益王宮者康熙中士人程某遇  
絲老於漢陽舟中風鬟雲鬢老大村莊葢流落爲

陶真婦矣相見之間不禁潛然程爲置酒絲老撥  
琵琶唱故宮彈詞益用悲切乃贈二詩以別

贈絲老

當年結客上樊樓檀板金樽夜不休笑打彩絲交鼓瑟醉  
移紅燭並藏鈎鶯花舊約餘莊夢江漢相逢盡楚囚已是  
青衫無限淚琵琶何用響孤舟

天荒地老嘆沉淪同作昆明劫後身金縷歌殘紅日暮銅  
人淚落白頭新醴陵詞賦空餘恨梁苑衾帷只怨春珍重  
麻姑烏爪在漫從滄海話揚塵

悼杏雲詩

廣信司馬樹亡姬姓施氏名杏雲蘇州人姿性端

慧好幽潔厭人事掃閣供佛日誦楞嚴法華經數  
遍間作小詩多悟語臨黃庭帖極工偶得疾屏藥  
不御遂死死之日猶索梨花供餅年甫十九其友

人以詩悼之

按詩詞意疑  
卽司馬樹作

詩

冷寂盤螭鏡掩匳虛期中婦咏鳴鵲輕埃素壁堆遺挂微  
雨黃昏濕畫簾吳語分明來夢裏楚愁迢遞上眉尖故家  
姊妹俱腸斷豈獨潘郎鬢欲鬚

最堪憐處是黃昏繡被仍然帖綵鴛不比桃花貪結子何  
曾巫女解招魂絃摧錦瑟聲多怨珠織鮫人淚有痕十九  
年來彈指過彩鸞惟有韻書存

蓮幢繡字證毘耶明月前身定不差桃葉已殘紅雨渡柳  
絲空漾碧窻紗也知朝槿無多艷信覺寒燈不易華經閣  
可憐勤禱佛如何共命異頻伽

蟾蜍光冷映梁恩不盡春蠶死後絲花影半墻人未睡蜚  
聲滿院漏頻移每逢故處心多感乍入窮秋氣轉悲最是  
已歸蘭麝土遠山猶與鬪纖眉

吳姬水調罷新腔擁髻淒然伴夜釭香草十年成幻夢寒  
風九月落空江情深可忍回頭溯愁極應難借酒降較爾  
先嘗滋味苦悵懷不禁淚痕雙

### 九蓮池詩

高安禪那寺前有池圓如鉢孟相傳舊產蓮每年



花只九朶故名九蓮池荒廢後有士人留題云

詩

大衆公姑冷落多西江借滿鉢孟河門前常稅秋風駕忘却衣裳製芰荷

盱江釣叟

賣花女張氏江南人家於盱幼許字周客亦江南也未適門而周死家貧父母喪依姊家以活姊故賣花度日者於是各負筐走官家有勸女更志者拂然去官家婦女皆敬禮之年四十餘卒盱江釣叟爲詩弔之

詩

海棠生小怨西風不寄含貞寄檻東一任此心成粉鈿錯  
教人喚買春紅

壁魯洞中銘

劉根字君安成帝時人冬夏不衣身生綠毛遇太  
乙玉女傳張侯魏三使者之文藏於貴溪龍虎山  
壁魯洞中有銘云云皮日休有詩

銘

天乙北祚神虎書太乙紫文玉章符北魁元範在龍虎得  
者當尋西壁魯

洪崖題壁詩

洪崖在西山石壁陡絕飛湍奔注卽古洪崖先生

得道處壁上有三詩不知何人所作

詩

去歲無人種今春乏酒材從教花鳥笑半醉臥樓臺  
入市非求利過朝不爲名有時陪俗物相伴且營營  
下調無人採高心又被嗔不知時俗意教我若爲人

湯周山詩

山在今萬載縣相傳晉湯周二仙人修道之所故  
名有唐人詩云云

詩

湯周二大仙廬此得昇天風俗因興廟春秋不記年錦雲  
張紫葢琴溜瀉鳴泉丹竈猶存鼎仙花發故園

沈彬墓石槨語

彬唐進士歸隱後嘗於茂林山指一穴命其諸子  
曰吾死當葬此後發地得石槨有字云云

語

佳城今已開雖開不葬埋漆燈猶未滅留待沈彬來

白石灘碑刻詩

宋英宗治平元年大水新城石城西港白石灘獲  
碑數片有詩云云

詩

太原王氏女金陵韓守妻戊辰年八月葬在石城西

日爲弓兮月爲箭射四時兮生收變千年萬年松栢風悲

盡死亡人不見

德興邑解石刻詩

詩不知何人所作邑丞高季安刻於石邑宰潘傳  
重刻之載宋鄱陽張世南游宦紀聞

詩

仕宦之身天涯海畔行商之身南州北縣不如田舍長相  
見面門無官府身卽強健麻麥遍地猪羊滿圈不知金貴  
唯聞粟賤夏新絹衣秋新米飯安穩眠睡直千直萬  
我田我地我桑我梓只知百里不知千里我飢有糧我渴  
有水百里之官得人生死孤兒寡婦一張白紙入著縣門  
冤者有理上官不嗔民卽歡欣上官不富民免辛苦生我

父母養我明府苗稼萋萋曷東曷西父母之鄉天子馬蹄  
黃金臺石上鐫詩

吉水朝元嶺有方石亂點如金名黃金臺上鐫詩  
云云

詩

落落萬古石悠悠千載心人間不相遇白雲深處尋

貢院舊井銘

乾隆甲子布政使彭家屏於貢院鑿井掘得一石  
有銘云云旁署曰萬歷辛巳年鐫貢院有井由來  
舊矣

銘

江西詩集卷九十二  
天一地六湧珠瀉玉金幹四維丹砂千斛漱潤涵芳源深  
澤渥用汲王明並受其福

查嶺朱棺詩

紹興初朝省令諸州縣於驛路栽植松木時南豐  
委郭主簿至地名查嶺刊鉏之次忽見一朱棺微  
露棺首有詩云云郭大驚曰五百年前吾官姓已  
定豈偶然耶遂集隣伍遷葬於郭家山

詩

下後五百年頃畔出黃泉道逢郭主簿遷葬上高原

江西詩微卷九十二

江西詩徵卷九十三

南坡曾燠寶谷編輯

仙靈

梅

福 以下仙

福字子真遊峽江之玉笥山遇神人投以采郁木  
碧茸法子真悟因賦詩云云一日有青衣童子至  
曰司命奉勅權司郁木福庭幸勿遲詰旦衣冠別  
同隱者遂入郁木洞不知所在

詩

雲霞一逕通遲日鎖溶溶春色桃花岸溪頭采碧茸

丁令威



令威豫章人七歲入閤阜山修道千年化鶴歸鄉

下華表而歌

按飛天仙經載此歌首二句云是日丁令威學道千年今始歸

此小異

歌

有鳥有鳥丁令威去家千年今始歸城郭如故人民非何

不學仙家累累

葛仙公

葛仙公以吳赤烏七年八月十五日飛昇於閤阜

福庭東峯之側弟子鄒明等攀戀不已於是仙公

駐駕空中賦詩三篇付明普令歌誦開悟方來

空中詩

真人昔遺教愍念孤癡子變邪不信道厥亂由斯起身隨  
朝露晞悔恨何有已罪大不可掩流毒將誰理冥冥未出  
期劫盡方當止轉輪貧賤家仍復爲役使四體或不完整  
蹙行乞市不知積罪報怨天神不恃大道常無爲宏之由  
善始吾今獲輕舉修行立功爾三界盡稽首從容紫宮裏  
停駕虛無中人生若流水臨別屬素翰羈標靈妙紀

大道懼虛無寂寂中有精眎之若冥昧窮窮中昭明莫言  
道虛誕所患不至誠奚不登名山誦是洞真經一誦而一  
詠元音徹太清太上輝金容衆仙齊應聲十方散香花燭  
烟旃檀馨皇娥奏九韶鸞鳳諧和鳴龍駕騎空迎華蓋曜  
杳冥脩閑劫仍臺帝釋歛降庭八王奉丹液挹漱身騰輕

逍遙有無閒流朗絕形名神童夾侍側自然朝萬靈飄飄  
八景興流行白玉京七祖升福堂先亡悉超生王侯能篤  
信必爲天下貞大人體至德一切蒙其成

散誕游山水吐納靈和淵鍊氣同希夷靜詠道德篇至心  
宗元一冥感今乃宣飛駕馭九龍飄飄乘紫烟華景曜空  
衢紅雲擁帝前暫遷蓬萊宮倏忽已賓天偉偉衆真會渺  
渺凌重元體固無終劫金顏隨日鮮歡樂太上境悲念一  
切捐誰能離死壤結是冥中緣悠悠成至道出入有無間  
微妙良難測智者謂我賢若能宏衆妙輕舉升神仙

張盛

盛字元宗漢天師曾孫初嗣敎居南鄭魏太祖封

都亭侯不受遂攜劍印經籙自漢中還郡陽入山  
得祖師元壇丹灶故址卽地爲居以三元旦登壇  
傳籙四方學道者日衆遂以劍印付子昭成旣示  
化不踰年復於廣西賀州爲廣王說法嘗謂人云  
云

語

西蜀鶴鳴東吳龍虎功行旣成再遊南斗

吳  
猛

猛字世雲新吳人幼以孝聞仕吳爲西安令家焉  
遇異人丁義復師南海太守鮑靚得秘法晉武帝  
時於西平乘白鹿車冲虛仙去

經廬山贈山神徐君

仰瞻列仙館俯察王神宅曠載暢幽懷傾蓋付三益

張 甌

甌饒州洪厓鄉人有道術西晉時居洪厓山或曰  
卽果老也好飲酒嘗賦詩云云後入豫章西山煉  
丹天寶末忽大霧尸解去

詩

去歲無田種今年乏酒材從教花鳥笑佯醉卧樓臺

楊筠松

筠松唐時人修鍊於蓮花廳之元陽洞中得秘府  
書了叅元旨注黃庭內經行世服太極隱芝仙去

越數百年復至以鐵筆鐫詩石上今洞外大石現  
巨人履跡傳爲筠松遺蹟手植杏花繁盛如昔

元陽觀

最愛一溪水高人此結廬繞門多碧草積案有殘書生計  
茶煙裏行藏竹夢餘偶來堪習隱不羨子雲居

重過元陽觀以鐵筆鐫石上詩

飛過元陽撫舊栽琳宮幾度杏花開洞天惟我多生別五  
百年間又再來

李洞庵

洞庵不知何許人唐時住南豐紫霄觀已百餘年  
童顏不衰忽作詩辭去

詩

遊子離魂隴上花風吹浪捲到天涯一年十二回圓月十  
一回圓不在家

李夢符

夢符平初人在洪州日與布衣飲酒狂吟嘗以釣  
竿懸一魚向市肆唱漁父引賣其詞好事者爭買  
之得錢便入酒家或抱水入水及出身上氣如蒸  
後不知所在

荅常學士

罷修儒業罷修真養拙藏愚三十春到老不疎林裏客平  
生難見日邊人洞桃深處千林錦巖雪鋪時萬草新深謝

名賢遠相訪求聞難卜鳳爲鄰

漁父引

村寺鐘聲度遠灘半輪殘月落山前徐徐撥棹却歸灣浪  
登朝霞錦繡翻

漁弟漁兄喜到來波官賽却坐江隈椰榆杓子木癭杯爛  
煮鱸魚滿案堆

譚峭

峭字景昇卽紫霄真人也住廬山棲隱洞嘗於終  
南山著化書出授宋齊邱托序之行世齊邱將酒  
灌之沈湎以牛皮裹縫投於江爲漁人取獲剖開  
見先生齁齁卧不止喚之久方覺乃曰宋齊邱奪



我化書沉我於江因留詩云云遂化風去

詩

纔作長江扇作天鞞鞭拋向海東邊蓬萊信道無多地只在譚生拄杖前

伊用昌

用昌不知何許人與其妻乞食多在江右廬陵宜春諸郡出語輕忽常爲人毆擊呼之爲伊風子愛作望江南詞與妻唱和詞皆有旨妻有殊色豪富子弟以言笑戲調不可犯夫妻至南城縣丐死牛肉食之死後人有見之者夫妻皆躡虛而行發視所埋處惟有爛牛肉無別物

望江南詞詠鼓

江南鼓梭肚兩頭樂釘著不知侵骨髓打來只是沒心肝  
空腹被人謾

題茶陵縣門

江南有茶陵縣官及胥吏怒逐出界

茶陵一道好長街兩邊栽柳不栽槐夜後不聞更漏鼓只

聽鎚芒織草鞵

題酒樓壁

用昌死後一年有江西鎮將丁於其地見用昌夫妻仍唱望江南詞

此生生在此生先何事從元不復元已在淮南雞犬後而  
今便道玉皇前

題遊帷觀真君殿後

用昌渡江至觀後題此詩夫妻連臂入西山自此更不出其詩

後題衡云定億兆恒沙軍國主南方赤龍神王伊用昌

言集 卷九 一三  
日月祥開瑞氣纏  
農家應作大神仙  
臺端揮洒風雷力  
劍下驅馳造化權  
更與中原新禮樂  
永教邊境絕烽煙  
列仙功業只如此  
直上三清第一天

留題閣皂觀

花洞門前吠似雷  
險聲流斷俗塵埃  
雨噴山脚毒龍起  
月照松梢孤鶴回  
蘿幕秋高添碧翠  
畫簾時捲到樓臺  
兩壇詩客何年去  
去後門關更不開

湖南闔齋吟

用昌入湖南謁馬氏時方設齋獨不誦

詩吟畢拂衣而起衆訝異乃逼問之出門不見

誰人能識白元君  
上士由來盡見聞  
避世早空南火宅  
植田高種北山雲  
雞能抱卵心常聽  
蟬到成形殼自分  
學取

大羅些子術免教松下作孤墳

吳涵虛

涵虛字含靈江西人出家爲道士居南岳俗呼爲  
吳獠好睡經旬不飲食常言曰人若要閑卽須嬾  
好勤卽不閑也後唐清泰二年羽化宋乾祐中有  
人於嵩山見之

上昇歌

玉皇有詔登仙職龍吐雲兮鳳著力眼前驀地見樓臺異  
草奇花不可識我向大羅觀世界世界卽如指掌大當時  
不爲上昇忙一時提向瀛洲賣

李公佐僕

李公佐字顓蒙舉進士後爲鍾陵從事有僕執役甚勤公佐不知爲異人也一旦留詩一章凌空而去

留詩

我有衣中珠不嫌衣上塵我有長生理不厭有生身江南神仙窟吾當混其真不嫌市井喧來救世間人蘇子跡已往顓蒙事可親莫言東海變天地有長春

章江書生

金陵陳省躬顯德中爲臨川宰舟經章江泊女兒浦抵暮有書生不通姓名登舟求見論語甚奇問今晉朝第幾帝省躬具實對微笑而已高吟一詩

省躬疑是神仙再拜叩問終無言出船不見所之

詩

西去長沙東上船思量此事已千年長春殿掩無人掃滿  
眼梨花哭杜鵑

沈廷瑞

廷瑞一作麟

廷瑞字紫庭高安人吏部侍郎彬子有道術嗜酒  
寒暑一單褐數十年不易常跣行日數百里林棲  
露宿多在玉笥浮雲二山老而不衰雍熙二年無  
疾而終後二年閭阜山僧昭瑩遇之留詩爲別瑩  
到玉笥始知其死發壟見空棺得片紙遺詩於穴  
旁蓋尸解矣

荅高安宰

宰戲問道士何時  
成道應聲成詩

何須問我道成時紫府清都自有期  
手握藥苗人不識體含金骨俗爭知  
書符解遣龍蛇走動印還教海岳移  
他日丹青誰是侶青童引駕彩鸞隨

贈僧昭瑩

南北東西路人生會不無  
早曾依閭皂又却上元都雲片  
隨天濶泉聲落石孤何期早相遇  
樂共煮菖蒲

寄袁州陳智周

化後數年有人於江筠路  
次見之令將詩寄智周

名山相別後別後會難期  
金鼎銷紅日丹田老紫芝  
訪君雖有路懷我豈無詩  
休羨繁華事百年能幾時

壘穴遺詩

虛勞營殯玉山前殯後那知已蛻蟬應是元神歸洞府更  
無遺魄在黃泉靈臺已得修真訣塵世空留悟道篇堪歎  
浮生今古事北邙山下草芊芊

鄒希衍

希衍餘千人元明觀道士天聖間遇吳人張台符  
授以丹術四十年不置枕席年九十化有辭云云  
後三年有人見在西蜀又三年寄書與冠服至觀  
謝之其徒驚訝開墓視之已尸解

辭

戊亥重逢日乾坤透迴時幻身今已脫明日有丹梯

周貫



貫膠東人自號木雁子喜作詩往來西山日酣飲  
蓄一大瓢夜以爲溺器著華陽三編秘而袖之嘗  
居奉新龍泉觀熙寧元年至豫章石頭寺屍解

荅人

八十西山作酒仙麻鞬軋斷布衣穿相逢甲子君休問太  
極光陰不計年

題虛白觀

出郭十餘里籃輿試初程山高雲氣重野曠烟光輕斷石  
絡樹根欹崖溜泉聲行行款道宇一徑掌樣平仙隱記甘  
羅觀名取莊生寶藏絢金碧仙佩飛瑤瓊簷鐸自相語龕  
燈弄微明出門境界寬一笑大江橫蹢躅白羽衣孤鶴松

稍鳴

弋陽道人

鄱陽胡詠之朝散生平好道元符初嘗於弋陽見  
一道人青巾葛衣神氣特異延之對飲道人飲無  
算曰君有從軍之行去否胡竦然曰當去蓋是時  
欲就熙河帥姚雄之辟也道人索紙書一詩授詠  
曰爲我寄章相公問其姓名不肯言乃拂衣去明  
日遍邑物色竟無見者詠至京欲持謁子厚或止  
之他日子厚北歸聞有此詩索觀之嘆曰使吾早  
得此詩去位久矣豈復有今日乎

書與胡詠之

濟世應須不世才調羹重見用鹽梅種成白璧人何處熟  
了黃粱夢未回相府舊開延士閣武夷新築望仙臺青雞  
唱徹函關曉好卷游幃歸去來

王文卿

文卿字安道號冲和子南豐人一云臨川人母夢  
赤蛇而生父歿辭母遠遊遇異人授以絳囊秘文  
徽宗召見問對稱旨賜號冲虛通妙先生祈禱勅  
勒無不驗久之乞歸紹興中累徵不起一日爲酒  
食召鄉里自題其棺曰此身非假松板非眞牢籠  
俗眼跳出凡塵擲筆卧棺中葬時舉棺甚輕後常  
有人見之蓋尸解云

按丹霞洞天志文卿麻姑山道士有麻姑壇一詩不詳其

餘此據  
建昌志

### 麻姑壇

漉酒巾籠五岳冠  
傾攜琴鶴上朝端  
丹房晝睡烟霞煖  
紫府夜歸星斗寒  
詩就幾教山鬼泣  
劍靈那許俗人看  
麻姑報道桑田變  
一局仙棋尚未殘

### 丹霞洞

仙都久寓拜丹霞  
十里捫參路轉賒  
在昔齊王功德觀  
只今聖主奉仙家  
晴天可駭風雷震  
午夜堪驚綵仗華  
瘦骨不禁天上冷  
披衣直到月西斜

### 齊雲亭

高亭闌檻拂雲齊  
萬里鶯花望不迷  
報國有誰能仗節  
升

天由此可無梯蒼蒼日上扶桑遠擾擾塵飛泰岳低尚想  
方平臨勝會乘風勉自賦新題

碣石巖

支住乾坤幾萬年稜稜壁立舊江邊夜來紫氣三千丈疑  
是張華劍倚天

輓輶巖

天上霞開金井曉山中風引玉繩秋長江萬古吸不盡斷  
岸夕陽飛白鷗

碧蓮池

玉井靈根未易求輕盈體素更風流莫教仙子塵生鞵尚  
想真人葉作舟紫殿晝長香霧合清池夜靜月光浮多情

樂在壺中景肯把紅妝好自修

蔡經宅

四面青青似削瓜  
山中原是蔡經家  
金雞戲啄丹砂米  
玉女遊看碧藕花  
我愛拾薪烹白石  
誰能到海泛靈槎  
至今西蜀丹霞地  
應有神仙尚姓麻

秦人峯

難泛煙波一棹通  
錦桃終日漾霞紅  
未能立節揚千里  
已覺騰身在半空  
猛政固非秦主日  
清談豈是晉時風  
自慙塵累還搜繫  
洞裏神仙故不逢

王道堅

道堅貴溪人政和間赴召館於太乙宮徽宗訪以

修煉之術奏曰修煉非天子之事時徽宗預知國  
當有厄命禳之對曰修德可以回天禱禳之說不  
敢誤國力請還山紹興初高宗復召先一日鳴鼓  
集衆作詩云云比勅使至已化矣

詩

無心曾出岫倦翮早知還爲報長安使休尋海上山

馮觀國

觀國號無町畦道人邵武人幼警悟習儒業旣冠  
遊方外刻意神仙術遇異人傳授得導引煉丹之  
法人呼爲顛好吟詩放蕩不羈後寓宜春紹興末  
端坐作偈而逝

題李宣鄉家

南北東西總是差  
自知身命屬仙家  
祇因貪戀一杯酒  
誤卻碧桃千樹花

題化龍坊酒樓壁

若問先生歸去來  
此行直是到天台  
碧桃瑤草紫芝熟  
到日須容醉玉盃

謝俗人

路遍紅塵四百州  
幾多風月是良儔  
朝來應笑酡顏叟  
道不相侔風馬牛

述懷

落魄塵寰觸處然  
深藏妙用散神仙  
筆端間作龍蛇走  
壺



裏常挑日月懸謾說人倫來混世只將酒盞度流年潛修  
功行歸何處笑指瀛洲返洞天

無名道者

道者不知何許人紹興間永新建龍華會遊士雲  
集一道者坐化道壇中有詩云云

詩

萬里雲歸洞千山水向東玉爐香冷處煙散碧霞中

王敖道

敖道號浪仙入上高末山洞修道經年後不知所  
在

題龍居寺

靈刹倚山光無塵染洞房雲籠金地暖龍噴玉泉香松竹  
分幽逕樓臺聳上方蓬壺人到此僧伴遶迴廊

### 萬直臣

直臣字道同號元隱饒州人不娶修真妙元觀觀  
有葛洪丹井道同浚井得丹砂吞之後舉動異常  
一日水漲流大木至跳躍其上隨洪濤去數年後  
兄信臣於無爲州見之引入山中留宿及別與一  
囊曰明年大歉此可濟一鄉持歸視之良金也觀  
中道士病目一日直臣忽至爲舐之光明如初留  
詩云云

詩

按今是堂手錄以此詩爲  
饒州游道士書假簿詩

往往來來數百秋  
幻泡重作故人遊  
紫泥白雪尋常事  
何苦人間說不休

趙子甄

子甄安仁人幼出家至道宮得還丹術年九十餘  
卒葬冲虛山後三年有人遇於西蜀寄道友詩云  
云啓冢視之棺已空

寄道友

秦川蟬蛻已三回  
明月清風任去來  
寄語冲虛諸道友  
芒鞋竹杖不須埋

汪一雷

一雷浮梁人有道術邑人盧瑤宅爲觀宅旁地屬

李客弗與一雷夜以虎懼之其人求禳遂捨地築  
西山觀臨卒自題像云云後有發其墓者中止履  
一隻因相傳爲仙冢

題像詩

吾年七十七幾雨幾番風撒手清虛上一輪明月中

王蒙

蒙嘗游上高麻塘市李林家林喜植牡丹一日花  
盛開曰今日花好否蒙笑曰看到子孫能幾家又  
贈林弟德昭詩有終朝觀草木今日遇芝蘭之句  
德昭後貴子孫甚盛俱如蒙言後宿永豐觀道士  
知爲異人因鑰其戶次早開戶視之不見留詩樣

間遂不復出世

題永豐觀

水須大海龍方隱木是梧桐鳳始栖莫道男兒無去路碧霄雲外有丹梯

王子可

予可字南雲吉州人父本軍校南雲亦嘗隸籍年三十許病後忽發狂說世外恍惚事遇文士則稱大成將軍遇佛前則稱諦摩龍什遇道則稱騎天元俊遇貴游則稱威錦堂主人南渡後居上蔡鄆城間能把筆作詩文落紙數百言多不可句讀字亦怪異兵亂爲順天軍將領所得欲攜之北歸數

日卒後有見之淮上者

宮詞

水曲朱門漪漾漫一簾花雨日波寒金闥背觀鴛鴦冷春  
困秋千立畫干

南園湖石

翠雀銜雲墮翠蕪砥峯倒影卧平湖飛花不到穿簾月高  
倚晴天一劍孤

馴鶴圖

張伯玉家畫幀宮人徐行以手整釵一鶴後  
隨謂之馴鶴圖伯玉請賦詩欽叔常苦其作  
詩多不用韻限  
以釵來苦三字

寢處粧鉛未捲釵孤雲花帶月邊來六宮簾幕金鸞冷露  
濕晨烟啄翠苔

雜詩

白露沙灘浸綠湄  
小舟艤岸尚依稀  
山回屏曲江連樹  
春鎖人家深處歸

暗悲秋色素團團  
一雨飄零曉霽寒  
天淨長空烟歛處  
彩虹金挂樹頭山

宮體

紅葉鋪霜撼御階  
繡蓮塵蹴襯羅鞋  
袖沾鸞翅調簪語  
墮却銜鵲入鬢釵

騎馬金籠藉草歸  
翠鸞屏曲染紅霏  
凭欄山色春風裏  
喚得鶯兒燕子飛

田純靜

純靜自浙至贛修煉於景德觀一日尸解朝天門  
外令人棄之江中江水湍急尸不流口猶頌云云  
頌

六十八年老拙平生不會扭捏今日撒手便行獨伴清風  
明月

### 泉塘客

臨江泉塘李氏宴集賓客賦送春詩風雨交作悵  
然閣筆忽一人簑笠來謁既入遂援筆賦詩長嘯  
擲筆而去惟見門前有一回字乃知爲洞賓或云  
白玉蟾按泉塘客一作莎衣丐者地在建安一作  
野亭老父地在桐城途中此據臨江志收  
入



送春詩

怨風怨雨總皆非  
風雨不來春亦歸  
蜀魄啼殘花影瘦  
吳蠶眠老柘陰稀  
臉邊紅綻梅初熟  
口角黃消燕學飛  
我亦欲歸歸未得  
杖頭猶挂舊蓑衣

黃衣人

洪武二年中書右丞王溥遣人上言近督採材木  
於建昌蛇舌巖見巖上黃衣人歌云云其聲如鐘  
萬衆齊聽請宣付史館以彰符瑞大祖不許

歌

龍蟠虎踞勢岌嶷  
赤帝重興勝六朝  
八百餘年王氣復  
重垂從此繼唐堯

徐公

徐公五代時人逸其名修真於德興之雙溪龍潭  
側潭深莫測常坐卧巨石上一日偕妻入潭有龍  
迎之歲旱祈雨者投疏輒應明宣德間孫清簡公  
需往遊作詩詰之云塵世仙家兩隔離遙看白鶴  
舞東西春深瑤草綠生澗水暖桃花香滿溪兩字  
功名垂竹帛千年履跡印苔磯不知羽化人何在  
却使塵中夢易迷投入潭少頃卽有詩浮出云云

詩

五代興亡正亂離新安一脉到江西家君樂道居汾水大  
阮傳芳佳柏谿猶子宦遊黃菊徑老夫垂釣綠楊磯自從

背母朝元後春復秋還天地迷

不佞道人

道人居廬山石室天順後不知所終

題廬山石壁

一上上上到匡廬山眼觀四海身在五雲間芳草連天  
齊遮鸚鵡綠落花滿地亂點鴈鵠斑洗鉢池邊浪生龍戲  
躍講經臺畔風嘯虎生寒此處百丈紅塵飛不到清風明  
月讓與道人閒

卓小仙

小仙蜀人善畫好吟詠舉止異常自言姓卓人呼  
爲小仙嘉靖間寓鄱陽士大夫樂與遊延爲上賓

善飲能連盞吞入或納石口中須臾成銀永豐王  
召見小仙醉書其屏旋別去後有見之萬年城下  
者欲拉與語忽不見

書屏詩

披衣兼跣足開口笑王侯千年渾是醉一世不梳頭

雲水道人

新昌蔡某自幼焚香祝曰願見真人一日有雲水  
道人以白金一錠求質門者疑其盜拒之次日又  
以金釵來復拒之道人曰可語而主辭以未起道  
人升堂大詬擲釵於地賊獲怒逐之出門忽不見  
取其釵牢不可動蔡自取之釵股有詩云云

詩

乘興而來興盡回無緣相逐訪蓬萊金釵遺汝燒香債一  
笑人間不再來

黃東美

東美不知何許人愛酒落魄舉動跌宕人異之既  
卒有見之萍鄉者且寄聲里中舊遊方知爲口解  
贈黃美人詩

醉眼斜窺態萬端滿城桃李盡羞殘黃金釵壓雲雙鬢紅  
粉粧融雪一團羅帳睡濃春夢雨玉簫吹徹夜慘鸞少年  
願效東方朔獨對瑤池仔細看

蘇守初

守初清平人遊江西爲騎卒康熙初住江東廟每  
夜禮斗畢靜坐有巨蛇長數丈旋繞階下作禮斗  
狀或觸之不啗不驚人稍稍奇之乃佯爲顛狂又  
生惡瘡穢不能近庚辰二月忽沐浴更衣偕其徒  
趙太真遊玉虛觀至園中不見聞半空樂聲仰視  
有一紙下書詩云云嘗與郭元方善是日家人見  
守初肩蒲團款門元方走出迎之不見矣

詩

乍聞金闕詔重宣一霎仙風耳畔傳眼前消息無人見頃  
刻飛昇到太元

木客

鄱陽山中有木客秦時造阿房宮者食木實得不  
死時下山就民間取酒

詩

酒盡君莫沽壺傾我當發城市多巖塵還山弄明月

張麗英

以下女仙

字金華漢初寧都石鼓山下居民芒之女也生有  
奇光不對鏡但對白紈扇長沙王吳芮過賴聞其  
異強委禽焉女時年十五使來登山仰卧披髮覆  
石鼓下人謂其死芮使人往視之忽紫雲蒸起失  
女所在空中語云吾金星之精降治此山汝宜爲  
民立壇祈福芮始懼謝女已冲天矣後禱雨屢應

朱崇寧間封靈泉普應真人飛昇時歌詩十八章  
今存其五

歌

哀哀世事悠悠我思不可忤兮王威不可奪兮余志  
石鼓石鼓悲哉下土自我來觀民生實苦  
有鸞有鳳自舞自歌何爲不去蒙垢實多  
凌雲爍漢遠絕塵羅世人之子其如我何  
暫來斯會運往卽乖父兮母兮毋傷我懷

廬山夫人女婉

建康小吏曹著見廬山夫人夫人命女婉與著相  
見婉撫琴而歌歌畢婉便還



撫琴歌

登廬山鬱嵯峨晞陽風兮拂紫霞招若人兮濯靈波欣良  
運兮暢雲柯彈鳴琴兮樂莫過雲龍會兮樂太和

吳綵鸞

西山有遊帷觀每至仲秋車馬喧闐唐太和末有  
書生文簫往覲覩一姝甚妙其歌云云生意爲神  
仙佇立不去姝曰莫是文簫耶相引至絕頂坦然  
之地後忽風雨裂帷覆几俄有仙童持天判曰吳  
綵鸞以私欲洩天機謫爲民妻一紀乃與生下山  
歸鍾陵貧不自給日寫孫愐唐韻一編可售金五  
兩金盡復寫運筆如飛後往新吳越王山夫婦各

跨一虎陟峯巒而去今紫極宮寫韻軒尚存或曰  
姝卽吳負君猛女也

詩

若能相伴陟仙壇應得文簪嫁綠鸞自有繡襦并甲帳瓊  
臺不怕雪霜寒

于本大妻

本大故姓許旌陽族也得仙術變姓名夫婦偕隱  
西山下

得仙詩

醉舞狂歌踏落花綠羅裙帶有丹砂往來城市買山藥那  
箇西山是我家

龍女 以下神女

汝南許漢陽貞元中舟行洪饒間到一小湖中亭  
宇甚盛額曰夜明宮女郎六七人揖坐命酒一女  
郎誦感懷詩一章別後回顧飲所無見至灑口有  
人云昨夜溺四人一人得活言龍王諸女洞庭宵  
宴取四人血作酒緣客少不多飲我却得來問客  
爲誰曰一措大耳漢陽默自疑吐出血數升乃平

感懷詩

海門連洞庭每去三千里十載一歸來辛苦瀟湘水

廣利王女

長慶進士張無頗居南康將赴舉卧病於番禺逆

旅通善易者袁大娘授王龍潛以暖金合盛之曰  
有異人求醫持此往自能富貴數日果有黃衣宦  
者至云廣利王相召從去見王令治貴主疾出膏  
以酒吞之立愈厚贈而歸月餘有青衣送紅箋二  
詩云云頃之宦者又至曰貴主有疾如初乃復往  
王后見暖金合疑女有私白王以女娶無頗月餘  
歸居韶陽袁大娘至索酬二人各以珍寶遺之無  
頗問女女曰此袁天罡女程先生妻暖金合卽某  
宮中寶也久之無頗爲人疑訝與女俱去不知所  
終

紅箋詩

江詩集 卷九十三  
三  
羞解明璫尋漢渚但憑春夢訪天涯紅樓口暖鶯飛去愁  
殺深宮妬落花

燕語春泥墮錦筵情愁無意整花鈿寒閨欹枕不成夢香  
炷金爐自裊烟

宮亭湖神女

宮亭湖卽彭蠡下流湖神甚靈異能使湖中分風  
而南北秦少游宿湖邊惜竹軒夢神女自言維摩  
詰散花天女也以詩戲少游云云

詩

不知水宿分風浦何似秋眠惜竹軒問道文章妙天下廬  
山對面可無言

馬巫父

以下吟仙

弋陽馬巫父有道術後成地仙降乩胡天放家書

玉華山詩云云

詩

玉樓雲淡曉烟浮中有飛仙駕鶴遊下界此時方熟睡誰  
尋紫氣向青牛

西平王

清江彭綱未第時郡有鄒姓者因病請乩忽傳宋  
武帝至云西平王李有詩寄彭某因書云昔邑令  
唐昌爲我建一祠彭樂中實主之今其孫將赴秋  
闈先贈一詩鄒以其事白彭是年彭舉省試第一

贈彭綱

子有凌雲志今當誦祖芳看花馳紫陌開宴出黃堂虎榜  
名先定蟾宮桂已香聊成四十字相贈綠衣郎

湖漢二王

湖漢二王東鄉楊橋廟神也唐麟德間漁者舉網  
得異木置岸上有婦人搗衣其上樹輒流血鄉人  
怪之有異人至請爲刻神像皆金甲仗劍足下各  
履一人十俯一仰邑人羅必元官汀州汀大疫羅  
迎二王至汀時六月爲之降大雪雪黑色疫遂平  
愈至今靈顯每旱禱之輒雨

降乩詩

生在春秋戰國初吾神非漢亦非初世人欲識眞名姓先  
有公輸後有吾

雪後降神作咏黑雪詩

削鐵隨風片片飛烏鴉一陣掠天低窻前點點蠅敲紙階  
下紛紛墨灑泥幾樹花容消粉黛滿池冰色暗玻璃任他  
鏤月裁雲手未許高樓蘸筆題

婁聖妃

王士龍微鹽堂玉海詩載羣眞降乩詩內有謫星  
絕筆一首云此婁聖妃西江絕筆也崇正庚申二  
月星君傳我於大椿堂

按婁聖妃當卽寧庶人宸  
濠妃也以詩出乩筆故另

列於  
此



謫星絕筆

畫虎屠龍歎舊圖  
血書才了鳳睛枯  
迄今十丈鄱陽水  
流盡當年淚點無

南昌卜仙

南昌龔起元能以符召詩人魂  
降於卜多可傳誦  
進賢朱景岱將彙刻之一夕  
雷雨暴至失所在  
後遂不復作

秋夜

敲詩大半說新秋  
明月銜山倒入樓  
琴韻夜深蛩和調  
一番風雨洗銀鉤

金星紫硯古瓊瑤  
銀管新裝赤兔豪  
盡日焚香無客至  
滿

瀟夜雨打芭蕉起元有姪仲檢蓄一硯小而紫不甚惜後携至粵西主人易以十五總詢之曰瓊瑤也仲檢追懷者累日  
叶伯蓋預言之云

### 新建乩仙

### 秋夜

歸來鶴背露華濃一路香浮澹蕩風半夜白雲收拾盡人家都在月明中

### 黃希憲

希憲字又生官少司馬總督河道江左亂出亡沒於紹興一子友蘇字子瞻以赴義死順治間有上高曹孝廉過越偶憇一寺中有尼撫十歲兒出與語鄉里告以故泣拜曰我黃公之妾某氏也撫此

兒爲公護遺蛻日夜望子瞻來今已矣爲語其從  
子子范來取以歸吾老空門無憾孝廉歸語其事  
子范竟不赴後其家降乩仙大署希憲至判一詩  
云云時子瞻之婦在傍跪請曰大人柩在何處兒  
來奔歸衆因目子范子范有難色乩復判一詩擲  
筆而逝

初判詩

十年流落在他鄉今日重遊畫錦堂自謂文章能幹濟誰  
知時代有更張鳳毛繼美人何在雁塔題名夢一場子職  
未全君未報徒懷忠孝兩心傷

復判示子婦詩

青山隱隱路迢迢弱女焉能涉此遙猶子受恩當報答人  
情反面似鴟鴞

### 楊季重

季重瑞金人年三十七客贛死後二年降乩會昌  
賴稽立家書一詩衆不解復書云賴君忘我乎故  
人楊季重也與問答如平生少頃書去字乩遂止

### 詩

斜陽樹樹罩寒烟春雨春風洒墓田萬事不堪回首望一  
生好夢未曾圓

### 游龍

龍爲新建令去官後卽寓熊氏淇園後葬於太平

岡乾隆庚申歲邑宰邱蘭標將修墓詢之熊熊知其墓未詳因請凡筆判詩云云遂得其墓

詩

是是非非總未明淇園樂事祇空名諸君要問荒邱在一道寒光落太平

青洲子

乾隆壬午武寧屏山盛氏爲扶鸞之戲有仙曰青洲子號雲峯及松風子鶴亭閑道諸名與學士酬唱或懸筆作大字蒼古勁逸求者隨時直書多名言格句又教人修煉養靈之法不可勝記

獅崖晚眺

修水多奇石惟有獅崖好放眼最高樓斜陽下三島  
夜靜寒潭碧雲山面面新來遊艾子國却少問津人

吉州紫姑

詠手

笑折櫻桃力不禁時攀楊柳弄春陰管絃曲裏傳聲慢  
月樓前歛拜深繡幕偷回雙舞袖綠窻閒整小眉心秋來  
幾度挑羅襪爲憶相思放却針

鬼怪

田達誠借宅鬼

以下鬼

廬陵賈人田達誠治第新城有鬼自言居龍泉舍  
欲修葺借達誠廳事暫住又借其後堂爲子習樟

樹神女鬼善詩達誠具酒置紙筆須臾酒盡詩成  
凡數十篇筆作柳體或問其姓字不言賦詩寄言  
衆亦不諭後歲餘辭謝去

詩

天然與我一靈通還與人間事不同要識吾家真姓字天  
地南頭一段紅

魏朋妻

建州刺史魏朋秩滿後遂居南昌忽遇病迷惑若  
有所引接索筆書詩詩意一似亡妻贈朋作也後  
十餘日遂卒

贈朋詩

孤墳臨清江每覩白日晏松影搖長風蟾光落遐甸故鄉  
千里餘親戚罕相見望望空雲山哀哀淚如霰恨爲泉臺  
客復此異鄉縣願言敦疇昔勿以棄疵賤

聶昌鬼

昌本名山宋欽宗謂其有周昌風易名昌字賁遠  
臨川人由太學上舍釋褐歷戶部侍郎爲王黼所  
中罷知德安府又謫崇信軍副使安置衡州欽宗  
立召拜兵部侍郎遇事奮激不顧進同知樞密院  
陳扞敵之策帝壯之會金人再議和詔昌偕耿南  
仲報聘泣曰臣本欲爲國戰守今以和議行非臣  
志也願促勤王之師入衛以備之至絳緹而登城



爲州銓轄趙子清所害贈觀文殿大學士諡忠愍  
紹興中有張殊者自北歸過絳驛見壁間血書一  
詩云云蓋其精魂所作也

題絳驛壁

尾流一箭五心摧電掣雙眸兩臂開車馬踐時頭似粉烏  
鳶啄處骨如灰父兄有感空垂淚子弟無知不舉哀回首  
臨川歸未得冥中空築望鄉臺

劉鏗鬼

鏗無子以外族仲弁汝素爲後旣死仲弁本生家  
兄弟盤踞其室香燈弗顧一夕鏗見夢仲弁有怒  
色索紙筆書一詩云云詰朝仲弁焚香謝過遷其

兄弟別室

按錄有體儼詩一首已見卷內

詩

花邊臺榭柳邊城此日相逢各自親  
曾憶當年燈下語如今孤負隴頭春

周季發

季發字伯通宋時南昌人少穎異喜吟咏年三十  
六渡象牙潭忽兩鳥從空下銜其頭巾去旣歸隨  
卒踰年乃降於家吟詩云云族人神之爲刻其像  
凡遇水旱及諸疑貳不決事有所禱卽判筆爲詩  
驗若影響詩亦多佳製

降家詩

雲鶴翛然世外遊歸來庭樹又經秋塵寰不識芙蓉主琴  
榻空懸萬古愁

周公埠鬼

羅必元咸淳中爲餘干令有客被賊謀死於周公  
埠其魂以狀告無字照之有詩云云必元曰此必  
姓段名明者捕得服罪

上羅令詩

白雲分兩片秋月正揚輝惆悵江頭暮無船不可歸

清江鬼

元季清江有鬼作晚翠亭詩云云

晚翠亭詩

一徑入青松飛流淡晴綠道人晚歸來長歌振林谷山深  
不知求落葉下枯木須臾翠煙開月色照綵服

聶包鬼

包臨川人死數年忽詣南豐相沈道襲共飲其歌  
笑甚有倫次

鬼歌

花盈盈正聞行當歸不聞死復生

柴侍郎

嘉靖間鉅山費文憲常構別業其基乃宋柴侍郎  
故居也公頗勤勞建造一日卓午有絳袍冠帶者  
題棟柱云云公驚視之俄不見

題柱詩

我昔猶君昔君今勝我今盛衰皆有數何用苦勞心

大秀天王閣鬼

峽江大秀天王閣設考鬼司道士一人每夜取荆  
條一束置神前曉輒毀折懸鐘一道士擊之是夜  
有鬼抱鐘而吟云云鐘遂失聲

吟

雞未鳴天未曉秦檜事問未了

余登瀛鬼

武寧余登瀛工詩文萬歷間副貢恨不得第資志  
沒沒數月族人業賈者某暴卒復甦云至一村落

間遇登瀛握手慰勞如平生取徑送之歸且貽其姪某一詩云云語畢復沒

詩

一榻松風下茫茫萬里天白雲封紫岫黃榜付青箋

林三接

貢生林三接瀘溪人順治癸巳北上夜泊舟撫州千金陂盜劫隣舟驚而溺友人許孝廉子將爲瘞之水滸乙未清明之夕其師林甲夢三接來謁驚避之三接前慰曰師弟何畏耶咨以冥間事曰幽冥道隔知之何爲授以素箋乃題詩云云

詩

一杯黃土掩江濱芳草斜陽陌路人欲寫愁心相寄贈霜  
毫未染已傷神

鄭婉娥 以下女鬼

吳江沈韶洪武初汎舟游襄漢次九江登琵琶亭  
月下彷彿聞歌聲明日復往徙倚亭中有麗人來  
呼韶並茵坐曰妾僞漢主婕妤鄭婉娥也年二十  
而死殯於亭側因口占一律贈韶且命侍兒細蟬  
取酒韶與留連半載談元末羣雄興廢及僞漢官  
中事歷歷可記臨別以金跳脫爲贈

贈沈生

鳳艦龍舟事已空銀屏金屋夢魂中黃蘆晚日霞殘壘碧

草寒烟鎖故宮隧道魚燈膏欲燼妝臺鸞鏡匣長封憑君  
莫話興亡事淚濕臙脂損舊容

小水人

安成彭氏築庵山中命僕守之暮有女子自稱小  
水人徑入臥室僕固拒之女云只見船泊岸不見  
岸泊船何無情乃爾尋登僕榻僕懼取佛經執之  
女笑云經從佛出佛豈在經耶天將旦僕起擊庵  
鐘女取髻上牙梳掠髻忽走入松林不見壁上題  
詩云云

詩

妾住小水邊君住青山下青年不可再白日坐成夜



只見船泊岸不見岸泊船豈能深谷裏風雨誤芳年  
薄情君拋棄咫尺萬里遠一夜月空明芭蕉心不展  
解下羅裙帶無情對有情不知妾意重只道妾身輕  
經從佛口出佛不在經裏郎在妾心頭郎身隔千里  
月色照羅衣永夜不得寐莫打五更鐘打得人心碎

### 南城樓中女鬼

康熙丁巳新城有士子數人應建昌郡試僦居王  
城民舍旁有大園園有樓傾圯剝落時夜陰微雨  
一士居近樓側閱書未寢聞樓窻忽開有女子數  
人相語少時又有老嫗及兩女來借居話舊悲歎  
語皆了了可辨士人爲之淚下疑爲益王妃嬪流

落在外次日以問主人主人曰聞前年屠城時此  
家合室赴池塘死自後每夜樓中常有人言云乃  
共踰斷垣入碎草零花荒涼萬狀然弓鞋之跡所  
在多有樓上亦空洞無物惟餘鼠嚙繡譜數頁而  
已壁上墨跡粲然衆驚訝視之則虞美人南鄉子  
一斛珠蝶戀花踏莎行等詞凡五闕末有七言絕  
句云云相與感歎去是夜衆同伺之竟無所聞

題壁詩

紅梨花落送春還  
鶯老聲衰柳色殷  
最是倚闌腸斷處  
夕陽樓外夕陽山

峽江頂山寺怪

以下怪

渝川謝謬胡昱讀書於頂山寺夜半窗外有聲因  
破窗隙窺之霜月皎然水溝小木橋有一物如黑  
獼猴蹲於橋上須臾又有一物如枯槎長二三尺  
與黑者對蹲俄而逡巡起立黑者先吟二句白者  
續之互相稱賞忽寺犬自竇突出且吠且逐俱跳  
而去不知所之

詩

風定長林靜雲深片月沈寒霜打枯骨夜永惺惺吟

安福華嚴寺怪

宣德間安福華嚴寺僧月夜見兩矮鬼子吟行三  
云頃沒循迹掘之得無舌銅鈴一銅鉢一

銅鈹詩

幾度人間結善緣  
百花叢裏開墮天  
鸞皇一去無消息  
獨坐空階五百年

無舌銅鈴詩

梵語無多語  
空門卽善門  
夜深風露冷  
有口不能言

貓妖

鉛山尹秀才璜館穀某富家適諸生歸於舍獨宿  
館中方就寢忽聞環珮聲如是者再若有人叩關  
者叱問之蒼以貓兒遂披衣啓視月浸庭階聞其  
無人有白貓蹲踞逐貓走花欄至石假山而滅隨  
取火燭之石間得花箋半幅上有詩云云讀竟毛

髮森悚抱病歸踰月死不數年而富家以訟傾敗  
花牋詩

風刮藏舟堅枯魚悲朽索漫憐花際月月與花俱落

朱雀語

陶安公新吳人混跡爲陶師嘗冶鐵爐煙成紫蓋  
有朱雀集而鳴云云及期龍至安公跨而去二女  
修其術亦得仙天寶中名其居爲陶仙觀

朱雀語

安公安公道與天通七月七日迎汝以赤龍

廬山女

廬山女鯉魚也

贈朱朴詩

但持冰潔心不識風霜冷任是懷禮容無人顧形影  
知君久積池塘夢遣我方思變動來操執若同顏叔子今  
宵寧免淚盈顙

魚頭詩

淳熙八年春南城久雨漂漲漁者楊壽子於草郊  
港舉網覺太重獨力不能起爲所困幾墜水叫呼  
求救同業三人助力乃大魚騰躍於中徐徐拽至  
岸斃之重百許觔熟視額上隱隱有鮮紅字一土  
人爲辨識之云云

詩

三度入湖門四度遭大水下梢却逢楊壽子

芭蕉魂

雜組載芭蕉樹向日一面掘其覆土熱溺根上蕉  
魂冉冉附合鈇山張氏子讀書破破草堂牕外芭  
蕉一樹乃如前法試之漏初下冷氣侵毛髮而蕉  
魂至焉霧鬢風鬟華衣廣袖楚楚有致相於昵狎  
月餘館童每夜聽綠牕膩語嚶嚶疑有私奔者遂  
洩露其父勅移卧具敦迫歸家是夜蕉魂留七言  
二截洒淚而別

留別詩

粉香和淚溼紅綃破屋秋燈擁髻挑回憶箇人窻外立幾

番風雨可憐宵

撩起春蠶死後絲半墻花影夢迷離無情却被多情誤空  
怨青山叫畫眉



江西詩徵卷九十三